

華

陽

集

二



卷

二

集

二

華陽集

(二)

王圭撰

華陽集卷十一

表

內中奏告立冬表

伏以四氣代遷。盛德在水。田收賦入。民樂維時。迎寒于榮。國有常祀。靈觀祚德。庶格順祥。

又

伏以景延圭下。和襲緹中。惟統氣于三微。甫施生于萬奏。臨祕殿之清夜。露寶薰于大霄。庶將獨志之通。式埒繁釐之集。

內中奏告冬至表

伏以天地之元。陽施陰化。羣物萌動。嗣興歲功。于時嘉休。大被四極。匪神之造。曷以順宜。竭誠致精。尙或感格。

南郊禮成奏謝內外諸神御殿表

天正之吉。景氣晏休。自宮徂郊。稱秩元祀。萬祥來下。蒸被羣生。緊保有之。如克有就。

明堂奏告內中諸神及在京宮觀表

伏以嚴烈考之配。交上臺之歡。迺涓路寢之居。以倣合宮之制。乘秋季序。秩古遺文。敢薦至忱。期導來祖。

明堂禮成奏謝內外諸神御殿表

屬者酌皇祐之典。奉合宮之祠。嘉盛薦芳。美樂象德。誠孝孚盡。休祥顯臻。洊成曠儀。實荷丕蔭。

明堂禮成奏謝諸陵表

伏以九筵脩配。萬玉相成。孝盡人倫。報明天道。顧守鴻業。洊稽闕文。迨錫壽符。舉欽靈醴。

又

伏以紹綏寶圖。躬緝大祭。九秋燭吉。五室會精。鴻儀釋陳。嘉應顯見。惕懷先訓。遂格曠文。惟祚之休。曷報之極。

修神御殿權于觀文殿奉安祖宗御容表

伏以邦釁如昨。年陰載移。式瞻列聖之祠。將宅先皇之寢。旣圖新于靈構。爰庀事于嘉時。愴慕如存。式嚴遷告。

天貺節內中謝露香表

伏以上真眷命。丕迪于先猷。嘉瑞著符。洊臨于華節。猥承洪緒。祇奉前科。是夕玉女來臚。青童侍案。關八素之祕字。露七晨之返香。伏願高通太清。陰相寶祚。監孚精志。垂錫大禧。

又

伏以炎暑徂威。靈書告瑞。表錫符于上帝。爰紀節于嘉辰。霽景澄虛。寶薰露夕。仰格九清之監。永孚萬祚之休。

又

伏以候隆炎律。嶽薦珍符。本祚德于昌期。夙標名于令節。就被丹除之地。高通紫極之薰。尙監涓衷。益孚永佑。

又

伏以圓穹胙德。皇歷儲休。循祖烈之重熙。記節名于嘉候。大廷初肅。甲夜正清。敢薦信于高晨。願侈祥于昌會。

天慶節內中謝露香表

伏以歲適開元。月方成朏。稽慶源于道祖。發靈貺于真朝。顧循眇躬。膺被大統。敢格肅忱之蘊。終蒙保右之私。

天祺節內中謝露香表

伏以天發珍符。候臨嘉節。仰企紫晨之境。躬煩清夜之香。儲思中虔。逆釐下委。追述先猷之奉。永期丕祚。

之延。

又

伏以寶歷擁時。肇應帝衡之運。靈符錫命。夙昭祖烈之休。顧嗣守于丕圖。方仰循于前矩。爰臨佳節。更屬精衷。

先天節內中謝露香表

伏以新秋薦涼。甲夜臨霽。肅肅祕殿。寥寥太清。燃芳上騰。迎福下墮。維高監德。與衆承休。

又

伏以孟秋初吉。甲夜載涼。太霄廓虛。景緯澄霽。躬燃寶炷。仰達至誠。欽靈監之昭回。委鴻禧之穰簡。願言烝庶。同保壽康。

又

伏以清秋冠序。嘉節紀辰。望雲景之杳冥。度蘭煙之馥郁。至精馳越。靈造咸通。願錫殊祥。益隆永祚。

又

伏以孟秋初吉。甲夜新涼。迹遺事于祖朝。感下遊之眞駕。肆及眇躬之御。益虔靈顧之承。適履嘉辰。更孚精意。

又

伏以厥月孟秋。維時中氣。明發不寐。亡如事存。伏惟謹。皇帝威靈在天。功烈被世。瞻言僊御。來止眞祠。及茲搖落之辰。實增悽愴之感。奉承遺緒。居極永懷。

隆聖節內中謝露香表

伏以冬籥初寒。夜庭未艾。昔感飄遊之顧。嘗膺神策之祥。肆纂丕圖。載臨嘉序。企九清之玉景。燠百和之蘭煙。敢薦至忱。庶孚永祐。

又

伏以候應寒籥。霄嚴寶除。欽皇帝之肇祥。感上靈之降治。紀名佳節。錫祚昌期。爰洎纂承。益虔薰奉。

又

伏以寶祚之承。緬憑僊系。飄遊之下。顯著珍符。紀靈跡于嘉辰。凝異薰于祕殿。伏願上清降監。丕緒延鴻。陶庶物之阜成。格九圍之休靖。

乾元節內中謝露香表

願以眇生之辰。載履炎序。承天丕命。保乂有邦。側身寤興。思答貺施。靈薰之薦。庶格至忱。

乾元節內中奏謝祖宗表

臣以寡昧承基。託于民上。誕生之日。感愧先猷。晨食勞思。懼失聖業。在天流祉。以祐邦圖。

乾元節內中奏謝章獻章懿章惠皇后表

伏以紫掖留慈。報隆罔極。炎煒御氣。詳紀迺生。永懷鞠育之仁。莫及清溫之養。悼徽音之寢邈。斬後祉之是延。

皇帝祈福諸陵表

臣嗣守大器。夙夜祇栗。懼不足以承祖宗之聖業。乃自春以來。積勤違豫。豈臨聽之不明。災咎所緣而致哉。惟靈心顧懷。使保有天命。以丕承于邦祀。不亦宗社無窮之休。

皇帝康復奏謝諸陵表

臣嗣守丕序。不敢怠遑。萬幾積勤。至于違豫。在天之監。錫福以寧。夙夜嚴祇。益謹靈戒。

南郊青城皇帝問太皇太后聖體表

臣某言。尊彙聖之度。見泰元之尊。飭萬衛以徂郊。候初陽而薦玉。遽違信宿之侍。重結晨昏之思。寒律御辰。嘉休相德。

太廟皇帝問皇太后聖體表

臣某言。茲者諏景至之吉。肇國陽之禮。乃飭齋輿。先薦清廟。竚蠲成于孝饗。阻恭侍于慈闈。適履祁寒。仰

綏純社。

奏告永定陵表

伏以盛德錫符。夙啓休平之運。皇圖接統。長垂燕翼之謨。恭惟謚號皇帝。功格乾祇。道包繩契。恩留二紀。永深遺御之思。氣易中春。還及上賓之旦。申懷罔極。致薦如存。

奏告永定陵景靈宮慈德殿表

伏以守長世之基。緬懷垂裕之訓。愴流陰之遽。還履遏音之辰。恭惟謚號皇帝。德厚同天。仁深被物。顧威神之如在。保運祚以無疆。施及眇躬。獲承大統。空極遺弓之奉。何勝濡露之思。

仁宗掩皇堂皇帝奏告表

伏以日月不居。几筵如昨。山川之勝。陵邑旣新。惕遵遺訓之書。阻從大升之駕。涓辰維吉。復土卽期。瞻法御以長遠。結孝思之罔極。

皇太后奏告表

伏以萬邦在疚。音遏舜庭。七月戒辰。陵開漢邑。應龍岡之嘉兆。掩玉劍于幽局。風蕭騷而四鳴。日晻昧而西下。上漢之遊莫返。終天之恨何窮。

初忌酌獻永昭陵表

伏以春篇正闌。仙園何邈。空留言于玉几。已駐景于崑臺。適及遺弓之辰。靡勝濡露之感。就陳嘉獻。尙監哀悰。

奏告福寧殿景陵宮永昭陵表

伏以靈輿厭代。已隔于僊游。駒隙流陰。忽臨于練祭。恭惟謚號皇帝。功烈被世。威靈在天。遺弓劒于橋山。陳衣冠于漢廟。爰歷上賓之旦。何勝永慕之懷。

又

伏以昊天之德。雖懷欲報之心。三歲而除。敢越通喪之禮。恭惟謚號皇帝。宅靜淵之德。躬神睿之資。自仙馭之升遐。忽素冠之終制。願言未遠。摧泣何勝。

又

伏以白日賓空。莫返乘雲之御。暮春感節。載臨遏樂之辰。恭惟謚號皇帝。稽古凝猷。參天布化。輯九圍之至治。遺萬世之不休。永惟大統之承。何極終憂之慕。

永昭陵乾元節酌獻表

伏以白日賓天。早促乘雲之御。薰風紀節。載追感露之祥。撫玉几以悼心。望柏城而賁涕。敢陳芳薦。庸達孝思。

仁宗禪除奏告昭陵表

伏以三年之喪所不敢過。閒月而禫。及此而除。雖哀變之從宜。惟孺慕之如昨。明靈猶在。摧殞難勝。

奏告英宗永厚陵表

伏以歲華易晚。冬律又中。馳愛景于層城。結重冰于太液。恭惟謚號皇帝。早膺靈命。歛厭神機。漢寢朝寒。疑玉衣之自舉。驪宮夜永。想金雁之空飛。載感流陰。益深遙慕。

正月旦起居仁宗永昭陵表

伏以淑氣回郊。鮮飆動物。履四時之首祚。蒙萬國之嘉休。恭惟謚號皇帝。聖德天臨。神謀世賴。橋山夜永。空悲玉劍之沈。漢殿春長。猶憶椒觴之獻。僊遊何在。哀緒難任。

正月旦起居仁宗永昭陵英宗永厚陵表

伏以窮陰謝節。端月應辰。破新萼于上林。動輕漸于太液。恭維謚號皇帝。睿謨經世。靈德對天。萬國貢珍。不見涵元之會。六龍奉駕。莫攀閬苑之遊。感嘉歲之載新。望仙園而增慕。

寒食節起居南京鴻慶宮等處神御殿表

伏以桐花初茂。榆火載新。瞻言仙馭之遊。舊載名封之祀。仰威神之不昧。感時節之又遷。惕奉遺謀。永懷孝慕。

又

伏以神榆更燧。春露零虛。瞻勝宇之雖遙。奉靈遊而如在。恭惟謚號。皇帝陛下。茂經邦業。永繫民懷。欽法御之賓空。極遺仁之感物。顧茲菲德。嗣守丕圖。惕惟先訓之承。優若時思之慕。

寒食節起居諸帝陵表

伏以桐華近節。榆火變晨。感景物于流年。愴衣冠于遺寢。遐企御天之烈。永詒垂世之謨。施及眇躬。嗣膺大器。每伏孝思之惕。敢虔時薦之芬。

又

伏以華林遺景。將修禊水之遊。并土舊傳。已舉藏烟之令。恭惟謚號。皇帝履中天之運。詒萬世之謀。人避軒臺。終若威神之在。露零漢殿。空深忱惕之思。仙馭雖遐。嘉觴或顧。

寒食節起居諸后陵表

伏以春露零宵。屢驚節物之變。玉衣留御。永悼徽音之遐。肆守丕圖。遙遵慈訓。屬桐華之俯候。瞻羽駕以馳思。

又

伏以淑律向闌。感孝思之無極。仙園在望。愧祇謁以未遑。永言遺訓之存。施及眇躬之御。嘉辰又至。芳薦

惟恭。

六月旦起居仁宗永昭陵表

伏以氣應林鍾。日躔東井。候溫風之始至。感溽暑之將徂。恭惟謚號皇帝。仁澤具深。光靈未遠。神游安在。邈四海之所懷。仙寢空成。度百年而猶畏。深惟罔極。永悼何勝。

六月旦起居仁宗永昭陵英宗永厚陵表

伏以律中大林。日臨東井。被溫風于羣物。徂畏暑于層空。恭惟謚號皇帝。皇躬儉勤。聖德廣密。露團金掌。終成漢武之仙。雲滿蒼梧。莫返帝虞之道。威容如昔。慨慕何窮。

七月旦起居仁宗永昭陵英宗永厚陵表

伏以蓐收御令。夷則旋宮。感涼風之動辰。望流火之斂夕。恭惟謚號皇帝。積隆丕烈。慎固成基。萬務勞精。終損文王之壽。九清棲景。莫追軒后之遊。搖落驚年。愴悽盈抱。

中元節起居南京鴻慶宮等處神御殿表

伏以音移商律。景肅金行。火殺芒以流空。水凝氣而收野。伏惟謚號皇帝。功高邃古。澤浸涵生。瞻勝迹以雖存。想遊神之何所。適履夷傷之候。載深悽愴之懷。永念燕謀。往虔嘉薦。

中元節起居諸帝陵表

伏以方秋之初。維月之望。聽商聲于夷則。校仙籍于元都。恭惟謚號皇帝。靈德在天。燕謀垂世。戎衣清難。定業當年。羽仗賓空。憩遊何所。肆奉承于大統。固覆被于遺仁。載驚搖落之辰。重發愴悽之慕。

又

伏以斗建申中。月躔枵次。適及夷傷之候。可勝悽愴之懷。恭惟謚號皇帝。垂業艱難。詒謀燕翼。軒臺弓劍。葬在橋山。漢廟衣冠。游于複道。興言沖眇。嗣守平成。顧秋序之甫初。惟孝思之罔極。

又

伏以清颿肅物。大火流空。乘西顧之素輝。應中元之嘉令。恭惟謚號皇帝。運膺炎歷。德覆鴻區。保漢鼎之安。成萬世之基業。起軒邱之畏。著百年之威神。顧歲景之貿遷。悵宸遊之緬邈。永循邦訓。內忱時思。

中元節起居諸后陵表

伏以素商肇新。華月初滿。望山陵之喬木。當天地之肅辰。伏惟謚號皇后。位正坤儀。道符乾極。流徽音于來裔。濟睿烈于當時。興言眇躬。嗣守鴻業。適及戒寒之候。何勝追養之思。

又

伏以維斗建申。其神執矩。當陰靈之既望。中商律之始清。恭惟謚號皇后。沙麓鍾祥。河洲播德。早儼儀于乾極。奄淪耀于軒宮。猥念菲涼。獲膺統序。悼音塵之已邈。增悽愴之無窮。

又

伏以方秋之初。其月既望。氣始肅而用事。火西流而戒寒。伏惟謹號皇后。配德純坤。徽音具紀。收神太素。懿烈如生。屬霜降之在辰。想飄遊之何所。有懷明發。罔極孝思。

中元節起居永昭陵慈聖光獻皇后表

伏以方秋厥初。維月既望。火流天而滌暑。露霑卉以舒芳。恭惟謹號皇后。功協聖謨。德侔坤極。仙遊不返。感急節之徂遷。孺慕未忘。瞻長陵而摧咽。

八月旦起居仁宗永昭陵表

伏以維時仲秋。厥月初吉。飛上林之涼葉。動伊水之寒雲。恭惟謹號皇帝。澤被含生。福流後裔。龍輿御漢。驚歲月之屢遷。玉座凝塵。恨光靈之永隔。每懷遺訓。空積悲悰。

八月旦起居仁宗永昭陵英宗永厚陵表

伏以流陰易遷。素律俄半。涼風颯以荐至。白露圓而下零。恭惟謹號皇帝。至德幾神。休功澤世。人心永慕。終疑蒼野之游。天令空回。邨及纓章之御。載驚搖落。中積愴悽。

十月旦起居仁宗永昭陵表

伏以流陰變律。寒氣凝辰。風匝野而四鳴。日臨圭而初薄。恭惟謹號皇帝。仁深萬類。謀燕後昆。弓劍不留。

已掩橋山之固。衣冠猶在。空陳渭水之遊。冬序又新。孝思無處。

十月旦起居諸帝陵表

伏以氣正上冬。時維良月。候北郊之初凜。當萬物之畢藏。恭惟謚號皇帝。凝命中天。施功四海。神機厭代。早從上漢之遊。寶曆凋年。居極念親之感。光靈如在。悽愴何窮。

又

伏以場功初入。關旅既來。肇升一氣之嚴。時告百嘉之備。恭惟謚號皇帝。誕膺天命。保有皇圖。方聖德之澤民。忽神遊之厭代。九清留景。萬世垂謀。適更寒籥之初。益起寢園之慕。

又

伏以氣薄水行。景移冬陸。愴衣冠之遺御。恍霜露之時思。恭惟謚號皇帝。盛德參天。至仁懷物。雖游神于霄極。固貽羨于蘿圖。敢達至虔。以修常薦。

十月旦起居諸后陵表

伏以令主水行。氣乘坎治。國謹門閭之戒。農登黍稷之儲。恭惟謚號皇后。秉坤順之儀。儷乾剛之德。音流彤管。慈訓猶存。塵晦玉依。仙遊何在。寒威忽變。孝感無窮。

又